

<兵者詭道>

兵者詭道也 故能而示之不能 用而示之不用 近而示之遠 遠而示之近 利而誘之 亂而取之 實而備之 強而避之 怒而撓之 卑而驕之 佚而勞之 親而離之 攻其不備 出其不意 此兵家之勝 不可先傳也(『孫子兵法』始計篇)

<不戰屈人>

凡用兵之法 全國爲上 破國次之 全軍爲上 破軍次之 全旅爲上 破旅次之 全卒爲上 破卒次之 全伍爲上 破伍次之 是故百戰百勝 非善之善也 不戰而屈人之兵 善之善者也(『孫子兵法』謀攻篇)

<知彼知己>

故知勝有五 知可以戰與不可以戰者勝 識衆寡之用者勝 上下同欲者勝 以虞待不虞者勝 將能而君不御者勝 此五者 知勝之道也 故曰 知己知彼 百戰不殆 不知彼而知己 一勝一負 不知彼不知己 每戰必殆(『孫子兵法』謀攻篇)

<先勝求戰>

見勝 不過衆人之所知 非善之善者也 戰勝 而天下曰善 非善之善者也 故舉秋毫 不爲多力 見日月 不爲明目 聞雷霆 不爲聰耳 古之所謂善戰者 勝於易勝者也 故善戰之勝也 無智名 無勇功 故其戰勝 不忒 不忒者 其所措必勝 勝已敗者也 故善

戰者 立於不敗之地 而不失敵之敗也 是故 勝兵先勝而後 求戰 敗兵先戰而後 求勝(『孫子兵法』 軍形篇)

<以礮投卵>

凡治衆如治寡 分數是也 鬪衆如鬪寡 形名是也 三軍之衆 可使必受敵而無敗 奇正是也 兵之所加 如以礮投卵者 虛實是也 凡戰者 以正合 以奇勝 故善出奇者 無窮如天地 不竭如江河 終而復始 日月是也 死而復生 四時是也(『孫子兵法』 兵勢篇)

<兵形象水>

故形兵之極 至於無形 無形 則深間不能窺 智者不能謀 因形 而錯勝於衆 衆不能知 人皆知我所以勝之形 而莫知吾所以制勝之形 故其戰勝不復 而應形於無窮 夫兵形象水 水之形 避高而趨下 兵之形 避實而擊虛 水因地而制流 兵應敵而制勝 故兵無常勢 水無常形 能因敵變化而取勝者 謂之神 故五行無常勝 四時無常位 日有短長 月有死生(『孫子兵法』 虛實篇)

<風林火山>

故兵以詐立 以利動 以分和爲變者也 故其疾如風 其徐如林 侵掠如火 不動如山 難知如陰 動如雷震(『孫子兵法』 軍爭篇)

<吳越同舟>

故善用兵者 譬如率然 率然者 常山之蛇也 擊其首則尾至 擊其尾則首至 擊其中則首尾俱至 敢問兵可使如率然乎 曰 可 夫吳人與越人相惡也 當其同舟而濟 遇風 其相救也 如左右手 (『孫子兵法』 九地篇)

<非危不戰>

夫戰勝攻取 而不修其功者凶 命曰費留 故曰 明主慮之 良將修之 非利不動 非得不用 非危不戰 主不可以怒而興師 將不可以愠而致戰 合於利而動 不合於利而止 怒可以復喜 愠可以復悅 亡國不可以復存 死者不可以復生 故明君慎之 良將警之 此安國全軍之道也 (『孫子兵法』 火攻篇)

<切磋琢磨>

子貢曰 貧而無諂 富而無驕 何如 子曰 可也 未若貧而樂 富而好禮者也

[子貢]諂卑屈也 驕矜肆也 常人溺於貧富之中 而不知所以自守 故必有二者之病 無諂無驕 則知自守矣 而未能超乎貧富之外也 凡曰可者 僅可而有所未盡之辭也 樂則心廣體胖 而忘其貧 好禮則安處善 樂循理 亦不自知其富矣 子貢貨殖 蓋先貧後富 而嘗用力於自守者 故以此爲問 而夫子答之如此 蓋許其所已能 而勉其所未至也

子貢曰 詩云如切如磋 如琢如磨 其斯之謂與

[子貢]詩 衛風淇奥之篇 言治骨角者 既切之而復磋之 治

玉石者 既琢之而復磨之 治之已精而益求其精也 子貢自以無諂無驕爲至矣 聞夫子之言 又知義理之無窮 雖有得焉 而未可遽自足也 故 引是詩以明之

子曰 賜也 始可與言詩已矣 告諸往而知來者

[子貢]往者 其所已言者 來者 其所未言者(『論語』)

<日莫途遠>

始伍員與申包胥爲交 員之亡也 謂包胥曰 我必覆楚 包胥曰 我必存之 及吳兵入郢 伍子胥求昭王 既不得 乃掘楚平王墓 出其尸 鞭之三百 然後已 申包胥亡於山中 使人謂子胥曰 子之報讎 其以甚乎 吾聞之 人衆者勝天 天定亦能破人 今子故平王之臣 親北面而事之 今至於僇死人 此豈其無天道之極乎 伍子胥曰 爲我謝申包胥曰 吾日莫途遠 吾故倒行而逆施之 於是申包胥走秦告急 求救於秦 秦不許 包胥立於秦廷 晝夜哭七日七夜不絕其聲 秦哀公憐之曰 楚雖無道 有臣若是 可無存乎 乃遣車五百乘救楚擊吳(『史記』 伍子胥列傳)

<一字千金>

當是時 魏有信陵君 楚有春申君 趙有平原君 齊有孟嘗君 皆下士喜賓客以相傾 呂不韋以秦之彊 羞不如 亦招致士 厚遇之 至食客三千人 是時諸侯多辯士 如荀卿之徒 著書布天下 呂不韋乃使其客人人著所聞 集論以爲八覽六論十二紀 二十餘萬言 以爲備天地萬物古今之事 號曰 呂氏春秋 布咸陽市門 懸千金其上 延諸侯游士賓客有能增損一字者予千金(『史記』 呂不韋列傳)

＜轍鮒之急＞

莊周家貧 故往貸粟於監河侯 監河侯曰 諾 我將得邑金 將貸子三百金 可乎 莊周忿然作色曰 周昨來 有中道而呼者 周顧視 車轍中有鮒魚焉 周問之曰 鮒魚來 子何爲者邪 對曰 我東海之波臣也 君豈有斗升之水而活我哉 周曰 諾 我且南遊吳越之王 激西江之水而迎子 可乎 鮒魚忿然作色曰 吾失我常與 我無所處 吾得斗升之水然活耳 君乃言此 曾不如早索我於枯魚之肆(『莊子』 外物)

＜蝸角之爭＞

魏瑩與田侯牟約 田侯牟背之 魏瑩怒 將使人刺之 犀首公孫衍聞而恥之曰 君爲萬乘之君也 而以匹夫從讐 衍請受甲二十萬 爲君攻之 虜其人民 係其牛馬 使其君內熱發於背 然後拔其國 忌也 出走 然後扶其背 折其脊 季子聞而恥之曰 築十仞之城 城者旣十仞矣 則又壞之 此胥靡之所苦也 今兵不起七年矣 此王之基也 衍亂人 不可聽也 華子聞而醜之曰 善言伐齊者 亂人也 善言勿伐者 亦亂人也 謂伐之與不伐亂人也者 又亂人也 君曰 然則若何 曰 君求其道而已矣 惠子聞之而見戴晉人 戴晉人曰 有所謂蝸者 君知之乎 曰 然 有國於蝸之左角者曰觸氏 有國於蝸之右角者曰蠻氏 時相與爭地而戰 伏尸數萬 逐北旬有五日而後反 君曰 噫 其虛言與 曰 臣請爲君實之 君以意在四方上下有窮乎 君曰 無窮 曰 知遊心於無窮 而反在通達之國 若存若亡乎 君曰 然 君曰 無辯 客出而君惘然若有亡也 客出 惠子見 君曰 客大人也 聖人不足以當之 惠子曰 夫吹管也 猶有嗃也 吹劍首者 呖而已矣 堯舜人之所譽也 道堯舜於戴晉人之前 譬猶一呖也(『莊子』)

<得魚忘筌>

筌者所以在魚 得魚而忘筌 蹄者所以在兔 得兔而忘蹄 言者所以在意 得意而忘言 吾安得夫忘言之人 而與之言哉(『莊子』外物)

<邯鄲之步>

且子獨不聞 夫壽陵餘子之學行于邯鄲與 未得國能 又失其故行矣 直匍匐而歸耳 今子不法 將忘子之故 失子之業 公孫龍口呿而不合 舌舉而不下 乃逸而走(『莊子』秋水)

<溫故知新>

子曰 溫故而知新 可以爲師矣

[亓亓]溫尋繹也 故者 舊所聞 新者 今所得 言學能時習舊聞而每有新得 則所學在我而其應不窮 故可以爲人師 若夫記問之學 則無得於心而所知有限(『論語』)

<野鼠求婚>

野鼠 欲爲其子擇高婚 初謂惟天最尊 遂求之於天 天曰 我雖兼包萬有 非日月 則無以顯吾德 野鼠求之於日月 日月曰 我雖普照 惟雲蔽之 彼居吾上乎 野鼠求之於雲 雲曰 我雖使日月 失明 惟風吹散 彼居吾上乎 野鼠求之於風 風曰 我雖能散雲 惟田間石佛 吹之不倒 彼居吾上 野鼠求之於石佛 石佛曰 我雖不畏風 惟野鼠穿我足底 則傾倒 彼居吾上乎 野鼠於是傲然自得曰 天下之尊 莫我若也 遂婚於野鼠(『旬五志』)

<借鷄騎還>

金先生善談笑 嘗訪友人家 設酌 只蔬菜 主人先謝曰 家貧市遠 絕無兼味 惟淡泊 是愧耳 適有群鷄 亂啄庭 金曰 大丈夫不惜千金 當斬吾馬 佐酒 主人曰 斬馬 騎何物而還 金曰 借鷄騎還 主人大笑 殺鷄餉之(『太平閑話滑稽傳』)

<舉案齊眉>

梁鴻字伯鸞 扶風平陵人也 家貧而尚節介 同縣孟氏有女 肥醜而黑 力舉石臼 擇對不嫁 日欲得賢如梁伯鸞者鴻聞而聘之 字之曰德曜 名孟光 至吳爲人賃舂 每歸 妻爲具食不敢於鴻前仰視 舉案齊眉(『後漢書』)

<百年河清>

冬 楚子囊伐鄭 討其侵蔡也 子駟、子國、子耳欲從楚 子孔、子蟜、子展欲待晉 子駟曰 周詩有之曰 俟河之清 人壽幾何 兆云詢多 職競作羅 謀之多族 民之多違 事滋無成 民急矣 姑從楚 以紓吾民 晉師至 吾又從之 敬共幣帛 以待來者 小國之道也 犧牲玉帛 待於二竟 以待彊者而庇民焉 寇不爲害 民不罷病 不亦可乎(『春秋左氏傳』)

<塞翁之馬>

近塞上之人 有善術者 馬無故亡而入胡 人皆弔之 其父曰 此何遽不爲福乎 居數月 其馬將胡駿馬而歸 人皆賀之 其父曰 此何遽不爲禍乎 家富良馬 其子好騎 墮而折其髀 人皆弔之 其父曰 此何遽不爲福乎 居一年 胡人大入塞 丁壯者引弦而戰 近塞之人 死者十九 此獨以跛之故 父子相保 故福之爲禍 禍之爲福 化不可極 深不可測也(『淮南子』)

<羊頭狗肉>

靈公好婦人而丈夫飾者 國人盡服之 公使吏禁之 曰 女子而男子飾者 裂其衣 斷其帶 裂衣斷帶 相望而不止 晏子見 公問曰 寡人使吏禁女子而男子飾者 列斷其衣帶 相望而不止者 何也 晏子對曰 君使服之于內 而禁之于外 猶懸牛首于門 而賣馬肉于內也 公何以不使內勿服 則外莫敢爲也 公曰 善 使內勿服 不踰月 而國人莫之服(『晏子春秋』)

<輾轉反側>

關關雎鳩 在河之州 窈窕淑女 君子好逑 參差荇菜 左右流之 窈窕淑女 寤寐求之 求之不得 寤寐思服 悠哉悠哉 輾轉反側(『詩經』)

<匹夫之勇>

齊宣王 問曰 交隣國有道乎 孟子對曰 有 惟仁者 爲能以大事小 是故湯事葛 文王事昆夷 惟智者 爲能以小事大 故 勾踐事吳 以大事小者 樂天者也 以小事大者 畏天者也 樂天者保天下 畏天者保其國 詩云 畏天之威 于時保之 王曰 大哉言矣 寡人有疾 寡人好勇 對曰 王請無好小勇 夫撫劍疾視曰 彼惡敢當我哉 此匹夫之勇 敵一人者也 王請大之(『孟子』)

<畫蛇添足>

楚有祠者 賜其舍人卮酒 舍人相謂曰 數人飲之不足 一人飲之有餘 請畫地爲蛇 先成者飲酒 一人蛇先成 引酒且飲之 乃左手持卮 右手畫蛇曰 吾能爲之足 未成一人蛇成 奪其卮曰 蛇固無足 子安能爲之足 遂飲其酒 爲蛇足者終亡其酒(『戰國策』)

<握髮吐哺>

周公誨成王 王有過則撻伯禽 伯禽就封 公戒之曰 我文王之子 武王之弟 今王之叔父 然我一沐三握髮 一飯三吐哺 起以待士 猶恐失天下賢人 子之魯 慎無以國驕人(『十八史略』)

<尾生之信>

尾生與女子 期於梁下 女子不來 水至不去 抱梁柱而死(『史記』)

<玉石俱焚>

今予 以爾有衆 奉將天罰 爾衆士 同力王室 尚弼予 欽承天子威命 火炎崑岡 玉石俱焚 天吏逸德 烈于猛火 殲厥渠魁 脅徒 罔治 舊染汚俗 咸與惟新 嗚呼 威克厥愛 允濟 愛克厥威 允罔功 其爾衆士 懋戒哉(『書經』 夏書 胤征)

<燎原之火>

汝不和吉 言于百姓 惟汝 自生毒 乃敗禍姦宄 以自災于厥身 乃既善惡于民 乃奉其恫 汝 悔身 何及 相時憐民 猶胥顧于箴言 其發 有逸口 矧予 制乃短長之命 汝 曷弗告朕 而胥動以浮言 恐沈于衆 若火之燎于原 不可嚮邇 其猶可撲滅 則惟爾衆 自作弗靖 非予 有咎(『書經』 商書 盤庚)

<白眉>

馬良字季常 襄陽宜城人也 兄弟五人 竝有才名 鄉里爲之諺曰 馬氏五常 白眉最良 良眉中有白毛 故以稱之(『三國志』 蜀書 馬良傳)

<愛人下士>

初 魏公子無忌愛人下士 致食客三千人 魏有隱士曰侯嬴年七十 家貧 為夷門監者 公子置酒大會 賓客坐定 公子從車騎 虛左 自迎侯生 侯生至 引坐上坐 賓客皆驚(『通鑑節要』2)

<齎糧藉寇>

宗室大臣諫曰 諸侯人來仕者 皆為其主遊間耳 請一切逐之 於是大索 逐客 客卿楚人李斯亦在逐中 行 且上書曰 昔穆公求士 西取由余於戎 東得百里奚於宛 迎蹇叔於宋 求丕豹、公孫支於晉 并國二十 遂霸西戎 孝公用商鞅之法 諸侯親服 至今治彊 惠王用張儀之計 散六國之從 使之事秦 昭王得范雎 彊公室 杜私門 此四君者 皆以客之功 由此觀之 客何負於秦哉 臣聞太山不讓土壤 故能成其大 河海不擇細流 故能就其深 王者不却衆庶 故能明其德 此五帝、三王之所以無敵也 今乃棄黔首以資敵國 却賓客以業諸侯 所謂藉寇兵 而齎盜糧者也 王乃召李斯 復其官 除逐客之令 卒用李斯之謀 兼天下(『通鑑節要』2)

<慎獨>

所謂誠其意者 毋自欺也 如惡惡臭 如好好色 此之謂自謙(慊) 故君子 必慎其獨也 小人閒居 為不善 無所不至 見君子而后 厭然揜其不善 而著其善 人之視己 如見其肺肝然 則何益矣 此謂 誠於中 形於外 故君子 必慎其獨也(『大學』)

<切齒腐心>

燕太子丹怨王 欲報之 將軍樊於期得罪 亡之燕 太子受而舍之 太子聞衛人荊軻之賢 卑辭厚禮而請見之 欲使劫秦王 反諸侯侵地 不可 因刺殺之 軻曰 今行而無信 則秦未可親也 誠得樊將軍首與燕督亢之地圖 奉獻秦王 秦王必說見臣 臣乃有以報 乃私見樊於期曰 聞購將軍首 金千斤 邑萬家 願得將軍之首以獻秦王 秦王必喜而見臣 臣左手把其袖 右手搯其胸 則將軍之仇報而燕見陵之愧除矣 樊於期曰 此臣之日夜切齒腐心也 遂自刎 以函盛其首 太子豫求天下之利匕首 使工以藥淬之以試人 血濡縷 人無不立死者 乃遣入秦 甲戌 荊軻至咸陽 王大喜 朝服 設九賓而見之 荊軻奉圖以進於王 圖窮而匕首見 因把王袖而搯之 未至身 王驚起 袖絕 荊軻逐王 王環柱而走 秦法 羣臣侍殿上者不得操尺寸之兵 左右以手共搏之 且曰 王負劒 負劒 王遂拔以擊荊軻 斷其左股 遂體解以徇 於是益發兵伐燕 戰於易水之西 大破之 燕王斬丹獻王 王復進兵攻之(『通鑑節要』2)

<高枕肆志>

二世東行郡縣 夏至咸陽 謂趙高曰 人生世間 譬猶騁六驥過決隙也 吾欲悉耳目之所好 窮心志之所樂 以終吾年壽 可乎 高曰 陛下嚴法而刻刑 盡除先帝之故臣 更置陛下之所親信 則高枕肆志寵樂矣 二世然之 乃更為法律 務益刻深 大臣、諸公子有罪 輒僇死(『通鑑節要』3)

<王侯將相 寧有種乎>

陽城人陳勝、陽夏人吳廣起兵於蕲 是時 發閭左戍漁陽 九百人屯大澤鄉 勝、廣皆為屯長 會天大雨 道不通 度已失期 乃召令徒屬曰 公等皆失期當斬 且壯士不死則已 死即舉大名耳 王侯將相 寧有種乎 眾皆從之 乃詐稱公子扶蘇、項燕 為壇而盟 稱大楚 勝自立為將軍 廣為都尉 入據陳 陳中父老請立涉為楚王 張耳、陳餘曰 秦為無道 暴虐百姓 將軍出萬死之計 為天下除殘 今始至陳而王之 示天下私 願將軍毋王 急引兵而西 遣人立六國後 自為樹黨 為秦益敵 敵多則力分 與眾則兵強 誅暴秦 據咸陽 以令諸侯 則帝業成矣 涉不聽 自立為王 諸郡縣苦秦法 爭殺長吏以應涉(『通鑑節要』3)

<書記名姓>

項梁者 楚將項燕子也 嘗殺人 與兄子籍避仇吳中 籍少時學書 不成去 學劍 又不成 項梁怒之 籍曰 書足以記名姓而已 劍 一人敵 不足學 學萬人敵 於是項梁乃教籍兵法 籍長八尺餘 力能扛鼎 才器過人 會稽守殷通 聞陳涉起 欲發兵以應涉 使項梁將 梁乃使籍 拔劍斬守頭 佩其印綬 門下大驚 擾亂 籍所擊殺數十百人 一府中皆懼伏 莫敢起 梁乃舉吳中兵 使人收下縣 得精兵八千人 梁為會稽守 籍為裨將 徇下縣 籍是時年二十四(『通鑑節要』3)

<絜矩之道>

所謂平天下在治其國者 上老老而民興孝 上長長而民興弟 上恤孤而民不倍(背) 是以君子有絜矩之道也 所惡於上 毋以使下 所惡於下 毋以事上 所惡於前 毋以先後 所惡於後 毋以從前 所惡於右 毋以交於左 所惡於左 毋以交於右 此之謂絜矩之道(『大學』)

<助桀所虐>

沛公至霸上 秦王子嬰素車白馬 係頸以組 封皇帝璽符節 降軹道旁 諸將或言誅秦王 沛公曰 始懷王遺我 固以能寬容 且人已降 殺之不祥 乃以屬吏 ○沛公西入咸陽 諸將皆爭走金帛財物之府分之 蕭何獨先入收秦丞相府圖籍藏之 以此沛公得具知天下阨塞戶口多少彊弱之處 ○沛公見秦宮室、帷帳、狗馬、重寶、婦女以千數 意欲留居之 樊噲諫曰 沛公欲有天下耶 將為富家翁耶 凡此奢麗之物 皆秦所以亡也 沛公何用焉 願急還霸上 無留宮中 沛公不聽 張良曰 秦為無道 故沛公得至此 夫為天下除殘賊 宜縞素為資 今始入秦 即安其樂 此所謂助桀所虐 且忠言逆耳利於行 毒藥苦口利於病 願沛公聽噲言 沛公乃還軍霸上(『通鑑節要』4)

<案堵如故>

沛公悉召諸縣父老、豪傑 謂曰 父老苦秦苛法久矣 誹謗者族 偶語者棄市 吾當王關中 與父老約 法三章耳 殺人者死 傷人及盜抵罪 餘悉除去秦法 諸吏民皆案堵如故 凡吾所以來 為父老除害 非有所侵暴 無恐 且吾所以還軍霸上 待諸侯至而定約束耳 乃使人與秦吏行縣鄉邑 告諭之 秦民大喜 爭持牛羊酒食獻饗軍士 沛公又讓不受曰 倉粟多 非乏 不欲費民 民又益喜 唯恐沛公不為秦王(『通鑑節要』4)

<急擊勿失>

或說沛公曰 秦富十倍天下 地形彊 聞項羽號秦降將章邯為雍王 王關中 今則來 沛公恐不得有此 可急使兵守函谷關 無內諸侯軍 稍徵關中兵以自益距之 沛公然其計 從之 已而項羽至關 關門閉 聞沛公已定關中 大怒 使黥布等攻破函谷關 十二月 項羽進至戲 沛公左司馬曹無傷使人言羽曰 沛公欲王關中 珍寶盡有之 欲以求封 羽大怒 饗士卒 期旦日擊沛公軍 當是時 羽兵四十萬 號百萬 在新豐鴻門 沛公兵十萬 號二十萬 在霸上 范增說羽曰 沛公居山東時 貪財 好色 今入關 財物無所取 婦女無所幸 此其志不小 吾令人望其氣 皆為龍成五采 此天子氣也 急擊勿失 項伯者 項羽季父也 素善張良 夜馳見良 具告以事 欲呼與俱去 張良曰 臣為韓王送沛公 沛公今有急 亡去 不義 不可不語 良乃入 具告沛公 固要項伯 入見沛公 沛公奉卮酒為壽 約為婚姻曰 吾入關 秋毫不敢有所近 籍吏民 封府庫而待將軍 所以遣將守關者 備他盜也 豈敢反乎 願伯明言不敢倍德 項伯許諾 謂沛公曰 旦日不可不蚤自來謝

沛公曰 諾 於是項伯復夜去 俱以沛公言報羽 因言曰 沛公不先破關中 公豈敢入乎 今人有大功而擊之 不義也 不如因善遇之 項羽許諾 沛公旦日從百餘騎來見羽鴻門 謝曰 臣與將軍戮力而攻秦 將軍戰河北 臣戰河南 不自意先入關能破秦 得復見將軍於此 今者有小人之言 令將軍與臣有隙 項羽曰 此沛公左司馬曹無傷言之 不然 籍何以至此 羽因留沛公與飲 范增數目羽 舉所佩玉玦以示之者三 羽不應 增起 出 召項莊 謂曰 君王為人不忍 若入前為壽 壽畢 請以劍舞 因擊沛公於坐 殺之不者 若屬皆且為所虜 莊入為壽 壽畢曰 軍中無以為樂 請以劍舞 羽曰 諾 項莊拔劍起舞 項伯亦拔劍起舞 常以身翼蔽沛公 莊不得擊 於是張良至軍門見樊噲曰 今項莊拔劍舞 其意常在沛公也 噲曰 此迫矣 即帶劍擁盾入軍門 披帷立 瞋目視項羽 頭髮上指 目眦盡張 羽曰 壯士 賜之卮酒 則與斗卮酒 噲飲之 羽曰 賜之彘肩 則與一生彘肩 噲拔劍切而啗之 羽曰 壯士復能飲乎 噲曰 臣死且不避 卮酒安足辭 夫秦有虎狼之心 殺人如不能舉 刑人如恐不勝 天下皆叛之 懷王與諸將約曰 先破秦入咸陽者 王之 今沛公先破秦 入咸陽 毫毛不敢有所近 還軍霸上以待將軍 勞苦而功高如此 未有封爵之賞 而聽細人之說 欲誅有功之人 此亡秦之續耳 竊為將軍不取也 須臾 沛公起如廁 因招噲出 間行趣霸上 留張良使謝羽(『通鑑節要』4)

<巧言令色>

子曰 巧言令色 鮮矣仁

[주석]巧好 令善也 好其言 善其色 致飾於外 務以悅人 則人欲肆而本心之德亡矣 聖人辭不迫切 專言鮮 則絕無可知 學者所當深戒也(『論語』)

<錦衣夜行>

居數日 項羽引兵西 屠咸陽 殺秦降王子嬰 燒秦宮室 火三月不滅 收其貨寶婦女而東 秦民大失望 ○韓生說項羽曰 關中阻山帶河 四塞之地 地肥饒 可都以霸 羽見秦宮室皆已燒殘破 又心思東歸曰 富貴不歸故鄉 如衣繡夜行 誰知之者 韓生退曰 人言楚人沐猴而冠耳 果然 羽聞之 烹韓生(『通鑑節要』4)

<婦人之仁>

初 淮陰人韓信 家貧 釣於城下 有漂母見信飢 飯信 信喜 謂漂母曰 吾必有以重報母 母怒曰 大丈夫不能自食 吾哀王孫而進食 豈望報乎 淮陰屠中少年有侮信者 因衆辱之曰 信能死 刺我 不能死 出我袴下 於是信俛出袴下 蒲伏 一市人皆笑信 以為怯 及項梁渡淮 信杖劍從之 居麾下 無所知名 項梁敗 又屬項羽 羽以為郎中 數以策干羽 羽不用 漢王之入蜀 信亡楚歸漢 王以為治粟都尉 亦未之奇也 信數與蕭何語 何奇之 漢王至南鄭 諸將及士卒皆歌謳思東歸 多道亡者 信亡去 何聞信亡 不及以聞 自追之 人有言王曰 丞相何亡 王大怒 如失左右手 居一二日 何來謁王 王且怒且喜 罵何曰 諸將亡者以十數

公無所追 追信 詐也 何曰 諸將易得耳 至如信者 國士無雙 王必欲長王漢中 無所事信 必欲爭天下 非信無可與計事者 顧王策安所決耳 王曰 吾亦欲東耳 安能鬱鬱久居此乎 乃召信拜大將 何曰 王素慢無禮 今拜大將 如呼小兒 此乃信所以去也 王必欲拜之 擇良日 齋戒 設壇場 具禮 乃可耳 王許之 諸將皆喜 人人各自以為得大將 至拜大將 乃韓信也 一軍皆驚 信拜禮畢 上坐 王曰 丞相數言將軍 將軍何以教寡人計策 信辭謝 因問王曰 今東鄉爭權天下 豈非項王邪 漢王曰 然 曰 大王自料 勇悍仁強孰與項王 漢王良久曰 不如也 信曰 信亦以為大王不如也 然臣嘗事之 請言項王之為人也 項王喑噁叱咤千人自廢 然不能任屬賢將 此特匹夫之勇耳 項王見人 恭敬慈愛 言語嘔嘔 人有疾病 涕泣分食飲 至使人 有功當封爵者 印刳敝 忍不能予 此所謂婦人之仁也